

一切瘡第一

漢東王先生《家寶》論小兒諸瘡癬。夫瘡者，皆因臟腑不調，風邪失守而得。或有積毒，或是風化為蟲，或則熱氣有盛，或是驚入皮膚。其大者，是滯於血脈而橫出於皮膚之間，若節其氣血則易破。若或風纏，則生其癩疹。或是外邪所入，即多燥癢而不定，其食毒則滯死其血氣，久則化為膿也。或作驚瘡者，驚本無物，亦蹉其血氣，在臟而為積，在腑故出皮膚為瘡，發遍身而四肢難較。(其積即是不化之食在脾。有積者，皆是脾得之。其脾胃主四肢，故有根本在臟，宜以取轉耳。)風瘡亦發遍身，其形甚小，世呼為疥。(其風出入毛竅之間，久感外風，化為氣也。)熱毒瘡發處不定，節滯其血，故作瘡。

蟲窠瘡常發於脛後，作其窠，窠內有蟲，如蟻子，蓋因腹中燒蟲隨氣化。其瘡即較而再發成片子，如癬相似，甚有死血，癢若以藥敷較，只是歸腹中，須是取卻蟲方瘥，及與殺蟲藥。驚瘡若發在四肢手足腕時，亦難瘥，宜服驚藥。頭瘡多因胎熱，及腎上沖之所為也。雁過瘡是肺熱也。(其瘡遇秋肺盛則發；遇春水旺必瘥。發在腳●●上，成片子也。)

《嬰童寶鑑》論小兒瘡是臟腑有積熱，並宿食停留胸中，毒瓦斯流十二經絡而生瘡也。

《千金》治小兒上下遍身生瘡方。

芍藥 黃連 黃芩(各三兩) 苦參(八兩) 大黃(二兩) 蛇床子(一升) 黃柏 菝 (一斤)
上八味 咀，以水二斗，煮取一斗，以浸浴兒。

《千金》苦參湯 治小兒身上下百瘡不瘥方。

苦參(八兩) 地榆 黃連 王不留行 獨活 艾葉(各五兩) 竹葉(二升)
上七味 咀，以水三斗，煮取一斗。以浴兒瘡上，浴訖敷黃連散。

《養生必用》治瘡腫退臟腑積熱方。

黃(切，焙) 人參 甘草(炙) 白藥子 栝萋根(等分)
上為末，煎柳枝湯放溫，溫調下一錢，日二三服。

《嬰孺》治小兒、大人一切瘡，醫不識者神效方。

水銀 甘草 黃柏 黃連 松脂(黃明者) 膩粉 土蜂窠(以泥為著壁者。南方均有，自可采覓。以上等分。)

上取水銀放掌中，以唾殺為青泥，入 碗中。以生麻油和研，生絹濾如稀餈，和藥末再研如稠餈。先以溫水洗瘡，帛拭乾塗之。治一切無名瘡。此方不須付醫人合和，令一細心子弟依方為之，塗一度即瘥。至如瘡有黃水出，塗之隨手便乾。如瘡癢不堪忍，塗之立止。如痛不撒者，塗之立瘥。比合此藥，前後救人非一也。

《嬰孺》治瘡飛烏膏方

輕粉(燒朱砂作水銀上黑煙也) 礬石(燒灰。各二兩)

上為末。甲煎和如脂，敷乳瘡，日三。為末敷，不須和。有汁自淹定，為散敷。諸種瘡黃爛一切悉效。

《嬰孺》治瘡又方

黃連(三兩，末) 胡粉(五分) 水銀(一兩)

上和勻，以紙裹，熟勻，敷乳瘡上及小兒頭垢百瘡，並悉大效。

《嬰童寶鑒》洗小兒瘡藥。

剪刀草 防己 黃連 黃柏 甘草(各一分)

上件同杵，每用一匙，布裹入蔥葉，以水同煎湯，候通手洗之。

《嬰童寶鑒》治小兒大人瘡方。

黃丹(一兩) 膩粉(一錢七)

上件研勻，嚼杏仁取汁，調藥敷之。

《莊氏家傳》治小兒諸般瘡欲出、已出、變証、壞証神效二仙湯方

防風 甘草(炙。各一兩)

上為粗末，先用杏仁一兩去皮尖，茶盆內研令細爛後，入上件藥末同更研，拌令勻。每用藥五錢，入陳粳米一匙，須用水一碗，煎米熟為度，如熟水飲之。

《趙氏家傳》治禿瘡、疔瘡、無辜瘡方。

皂角(三寸，不者) 鱉甲(一兩，燒存性) 豉(一合，炒焦) 膩粉(五筒)

上為末，後入粉一處研勻，生油調塗瘡上，先用漿水洗去瘡上不潔，然後上藥。此累經大驗，頭上一切瘡皆可治。

《吉氏家傳》治諸般瘡毒方。

黃柏 柏葉(各一兩) 輕粉(二錢)

上件為末，用雞子油調塗在瘡上，未瘥，更上一次。

安師傳瘡口久不合者方。

狗頭骨 空雞子殼(已抱出者) 乳香 沒藥 黃連

上五味，將狗頭骨及雞子殼各燒灰，乳香等各為細末，平取五者等分，以油蠟成膏，調塗搽瘡上便乾好。

若是曾水入後不合，即用皂子燒灰存性，入沙糖和貼瘡口上。少頃水出腫退，卻合前合瘡口藥。如腫水退，且用取水毒令腫退方合瘡口。

《子母秘錄》治小兒口瘡，兼治小兒尋瘡方。

上取重五日蝦蟆炙杵末，敷瘡上即瘥。

《子母秘錄》治小兒尋瘡方。

上嚼澤蘭心封上。

《子母秘錄》小兒尋瘡方。

上燒葵根末敷之。

安師傳治小兒尋瘡方。

上炒綠豆焦黑，研為細末，敷貼瘡上。

風熱瘡第三

《千金》**五香枳實湯** 治小兒著風熱，堅如麻豆粒，瘡癢搔之，皮剝汁出，或遍身頭面年年常發者方。

青木香(九銖) 麝香(六銖) 雞舌香 薰陸香 沉香 防風 秦艽 漏蘆(各半兩) 枳實(一兩半) 麻黃 升麻 黃芩 白朮(各一兩) 大黃(一兩十八銖)

上十四味 咀，以水五升，煮取一升八合。兒五六歲者，一服四五合，七八歲者，一服六合；十歲至十四五者，加大黃半兩，足水為一斗，煮取二升半，分三服。

《千金》**枳實丸** 治小兒病風瘙癢痛如疥，搔之汁出，遍身如麻豆粒，年年喜發，面目虛肥，手足乾枯，毛發細黃，及肌膚不光澤，鼻氣不利。此則小時熱盛極，體當風，風熱相搏所得也。不早治之，成大風疾。方：

枳實(麩炒，一兩半) 菊花 蛇床子 防風 白薇 浮萍 蒺藜子(各一兩) 天雄(炮裂，去皮臍) 麻黃(去根節) 漏蘆(各半兩)

上十味末之，蜜和丸如大豆許。五歲兒飲服十丸，加至二十丸，日二服。五歲以上者，隨意加之。兒大者，可為散服。日華子治游風、熱毒、風疹、惡瘡、疥癩，小兒壯熱方。上並煎棟皮湯浸洗，服食須是生子者名雌枝，皮一兩可入五十粒糯米，煎煮殺毒。瀉多以冷粥止，不瀉者以熱蔥粥發之。無子者名雄枝，能吐瀉殺人，不可誤服。

《嬰孺》**枳實湯** 治小兒著風熱，堅如麻豆，抓之皮剝汁出，或竟身頭面年年常發有時方。

枳實(六分，炙) 防風 秦艽 雞舌香 薰陸香(各二分) 麝香(一分) 沉香 黃芩 白朮 升麻(各四分) 大黃 木香(各十分)

上以水五升，煮一升八合，五六歲一服五合，七八歲六合。

《劉氏家傳》**摩風去毒神異膏** 治男子、女人不問老幼，身上生一切風瘡、腫毒、氣瘡、熱毒、瘡癩、生瘡發背才覺便點藥，擦熱即消。頭面風氣攻注，如蟲行攻擊，眼目動，種種瘡癩，久使自安。最治婦人黑斑、粉刺、粉靨、落妝及治鼻面酒，腳上瘡，並皆神效。使時一如面油塗，擦熱為度。

綿黃(半兩) 零陵香(一分) 赤芍藥 防風 川芎 生乾地黃 天麻(各一錢) 蠟(二兩半) 清油(十二兩)

上除黃蠟外，將眾藥捶擘細，以清油浸七日，文武火上煎至黃色，以新棉濾過去滓，方入蠟再煎，濾過入瓷器收之。

長沙醫者丁時發傳治胎中風熱，後生瘡滿身，或如疥癩方。

側柏 鬱金 蠅 天南星 地龍 黃芩 大黃(等分)

上件為末，用溫酒調下。

熱毒瘡第四

《聖惠》：夫小兒熱瘡者，是諸陽氣在表。陽氣盛則表熱，小兒解脫腠理開，則為風邪所客，風熱相搏，留於皮膚則生瘡。初作癩漿黃汁出，風多則癢，熱多則痛，血氣乘之則多膿血，故名熱瘡也。

《千金》治小兒熱瘡水銀膏方

水銀 胡粉 松脂(各三分)

上三味，以豬脂四升煎松脂，水氣盡，下二物，攪令勻，不見水銀以敷之。

陳藏器治小兒赤白游疹，火焱熱瘡。

上搗馬藻絞汁服，去暴熱熱痢，止渴。(生水上，如馬齒相連。)

劉禹錫《傳信方》亂髮雞子膏 主孩子熱瘡。

上以雞子五枚，去白取黃，亂髮如雞子許大。二味相和於鐵銚子中，炭火熬。初甚乾，少頃即發焦，遂有液出，旋取置一瓷碗中，以液盡為度。取塗熱瘡上，即以苦參末粉之。頃在武陵生子蓐內便有熱瘡，因閱本草至發。《本經》云：合雞子黃煎之，消為水，療小兒驚熱下痢。注云：俗中嫗母為小兒作雞子煎，用發雜熬，良久得汁，與小兒服，去痰熱，主百病。用發皆取久梳頭亂者。

《聖惠》治小兒熱瘡生於身體。黃芩散方

黃芩(三分) 石膏 柴胡(去苗) 川大黃(銼碎，炒) 川升麻(各一兩) 甘草(炙微赤，銼) 元參(各半兩)

上件藥搗，粗羅為散。每服一錢，以水一小盞煎至五分，去滓放溫，量兒大小分減服之。

《聖惠》治小兒身上生熱瘡，心躁，皮膚疼。枳殼散方

枳殼(麩炒微黃，去瓢) 甘草(炙，銼) 黃連(去鬚。各半兩)

上件藥搗，細羅為散。每服以蜜水調下半錢，量兒加減服之。

《聖惠》治小兒熱毒瘡。梔子膏方

梔子仁 川升麻 蛇銜 黃芩(各一兩) 犀角(屑，三分) 藍葉(切，五合) 生地黃(二兩)

上件藥細銼，以豬脂一斤半同入鐺內，於微火上煎十餘沸，濾去滓膏成，於瓷盒中盛，塗於故帛上貼之。

《聖惠》治小兒熱瘡黃膿出。黃芩膏方

黃芩(一兩半) 水銀(入少水與胡粉同研, 令星盡矣) 川大黃(各一兩) 黃柏 梔子仁 黃連(去鬚) 胡粉(各三分) 竹葉(二兩) 生地黄(二兩半)

上件藥除水銀、胡粉外, 並銼如豆大, 以新綿裹, 用豬脂一斤半入鑊內, 於慢火上煎十餘沸, 候藥色紫去綿, 以布絞取汁候凝, 下水銀、胡粉。以柳木篋攪令勻, 膏成以瓷盒盛, 日夜三四度塗之。

《聖惠》又方

黃柏 白礬(燒令汁盡。各一兩)

上件藥搗, 細羅為散, 敷於瘡上, 日三用之。

《聖惠》又方

黃連(半兩, 去鬚為末) 膩粉(一分)

上件藥研令勻, 以諸菜汁和, 塗於瘡上, 日三用之。

《聖惠》又方

上以豆豉炒乾, 搗末敷之。《嬰孺》仍先數煮桃葉浴之。

《聖惠》又方

上以伏龍肝搗末, 用雞子白和塗之。

張渙 青砂散方 治身體頭面熱毒瘡。

青黛(研) 朱砂(細研。各一兩) 硫黃(研) 水銀(以棗瓢研令星盡。各半兩) 胡粉(研) 赤小豆(各一兩)

上件拌勻研細, 每用少許, 用生油、膩粉調塗患處。

《惠眼觀証》芭蕉散 塗退丹毒熱瘡方。

寒水石(過) 蚌粉

上為末, 用芭蕉汁調塗, 鵝翎掃之。

《張氏家傳》治小兒生大血泡瘡。黑聖丸(雲和尚方)

草烏(三十二兩米泔浸三宿, 洗去皮尖, 簿切曬乾) 甘草(切, 焙) 零陵香 藿香(各洗, 銼, 晒) 茅香 五靈脂(洗去沙土, 晒, 各四兩) 荊芥(三兩, 銼, 日晒) 沒藥(入白瓦盞內) 川芎 石膏(入伏龍肝五兩, 乃灶下紅土, 加些不假, 細末。各一兩) 血竭(如無, 用乳香鉢內研細, 研時口中念元胡索字並是, 用二兩)

上件前藥, 各有過度, 為末, 用好酒糊為丸如大梧桐子, 陰乾, 磨第一等墨染過, 入些乳香在墨內, 亦陰乾甚佳, 都乾了, 用葛布袋盛之, 當風處。非但治頭風疼, 傷寒進飲食, 大小兒生大血泡瘡, 並治腫處, 醋磨貼之。治牙痛, 更治血風。有妊婦人不可服。

《莊氏家傳》治身生大瘡方。

黃丹(一兩) 膩粉(一錢七)
上研勻，嚼仁取汁，調藥敷之。

《王氏手集》治小兒疳熱諸瘡不瘥方。(魯直)
上取驢前蹄一只，自瀝水之下燒過為末，入少麝香，濕敷，乾油塗。

《吉氏家傳》治生下一百二十日內，身上或頭上遍身癰癤赤光腫，先用鎮心散，後用貼腫藥(方見急驚風門中，吉氏方用同。)
上用蓖麻子不拘多少，去殼爛研成膏，貼在腫處內自消，赤腫結成者，貼得破。

安師傳治小兒熱毒瘡方。

生硫黃(一錢) 檳榔(一兩)
上同為細末，油調敷之立效。凡欲用藥，先爛搗絲瓜兒罨一宿，次日敷貼。

頭面身體生瘡第五

《巢氏病源》小兒頭面身體諸瘡候：臟腑熱盛，熱氣衝發皮膚，而外有風熱折之，與血氣相搏則生瘡。其狀初赤起，後乃生膿汁，隨癢隨發。或生身體，或出頭面，或身體頭面皆有也。

《千金》治二百日小兒頭面瘡起，身體大熱方。

升麻 柴胡 石膏(各六銖。《千金翼》各用一兩) 甘草(炙) 當歸(各十二銖) 大黃(十八銖。《千金翼》用三兩) 黃芩(十八銖)
上七味 咀，以水四升，煮取二升分服，日三夜一。量兒大小用之。《千金翼》同服外，仍多煮此藥洗瘡佳。

《千金》治小兒頭面身體悉生瘡方。

上用榆白皮隨多少，曝令燥，下篩，醋和塗綿以敷瘡上，蟲自出。亦可以豬脂和塗之。

《千金翼》苦參湯 主小兒頭面熱瘡方。

苦參(八兩) 大黃 芍藥 黃連(各三兩) 蛇床子(一升) 黃芩(二兩) 黃柏(五兩) 菝(一斤)
上八味切，以水三斗，煮取一斗半，洗之，日三度大良。《千金》云：治上下遍身生瘡。

《千金翼》又方

大黃 黃芩 黃柏 澤蘭 礬石 石南(各一兩) 戎鹽(二兩) 蛇床子(三合)
上八味切，以水七升，煮取三升，以絮內湯中洗拭之，日三度。

《千金翼》又方

上熬豉令黃，末之，以敷瘡上，不過三愈。

《聖惠》以此方治小兒頭面身體有惡氣，數起生瘡，仍每用先煮桃葉湯，洗淨拭乾敷之。

《外台》：《古今錄驗》療小兒面及身上生瘡如火燒方。

上取黃米一斗，末，以蜜水和塗之，瘡為度。

《外台》：《古今錄驗》又方

上以赤地利搗末，以粉之佳。《聖惠》以水浸梔子，膿汁調赤地利塗瘡。

《外台》：《廣濟》療小兒頭面生熱瘡方。

黃連(八分，《聖惠》用四分) 蛇床子 黃柏(各八分) 胡粉(四合。《聖惠》用半兩。炒令黃色)

上四味搗散，麻油和塗瘡，遍敷之佳。《聖惠》黃連散方同，兼治身體生熱瘡，若面上瘡，以豬脂和塗。

《子母秘錄》治小兒面上忽生瘡黃水出。

上以鯽魚頭燒末，和醬清汁敷，日易之。

《子母秘錄》治小兒頭面身上生諸瘡。

上燒蛇蛻末，和豬脂敷上。

《聖惠》治小兒頭面身體生赤瘡，濕癢、黃水不止，宜敷漏蘆散方

漏蘆 當歸(銼、炒) 黃柏(銼) 黃連(去鬚) 麝香(別研。各一分) 膩粉(二分，研入) 五倍子(一兩，燒令煙盡)

上件藥搗，細羅為散，入研了藥，更研令勻。每用時先暖鹽漿水洗瘡令淨，拭乾，以生油調，稀稠得所，塗於瘡上。如已乾處，即不再塗。餘濕赤處即更塗之，以乾瘡為度，塗藥後未得洗之。

《聖惠》治小兒頭面風瘡，及身上或如麻豆多癢，吳茱萸散方

吳茱萸 鴿糞(各微炒) 赤小豆 薰黃(研入) 白礬(飛。各半兩) 葶藶子(微炒) 皂角(燒灰) 藜蘆(各一兩)

上件藥搗，細羅為散，以生油旋調塗瘡上，以瘡為度。

《聖惠》治小兒頭面身體卒生惡瘡。胡粉散方

胡粉(炒，令黃色) 黃連(末，各一兩) 水銀(一分，入少水並胡粉研，令星盡)

上件藥都研令勻，以豬脂調塗之。

《聖惠》治小兒頭面身體生瘡熱痛。黃柏散方

黃柏(銼) 黃連(去鬚。各一兩) 水銀(半兩) 苦參(三兩，銼)

上件藥搗，細羅為散，以豬脂和，攪乳入，研水銀星盡。每使先用泔清洗瘡令淨，拭乾敷之，日三上效。

《聖惠》治小兒頭面身體生瘡，累醫未效，宜用此方貼之。

吳茱萸(半兩，濃炒) 川大黃 龍膽(去蘆頭。各一兩) 膩粉 麝香(細研。各一分)

上件藥搗，細羅為散，以生油調可瘡塗，日二用之。

《聖惠》治小兒頭面及身體生瘡，久不瘥，癢癢。**殺蟲蕪黃散方**

蕪黃(三分) 葶藶(各炒) 白礬(燒令汁盡。各一兩) 吳茱萸(半兩，微炒)
上件藥搗，細羅為散，以生油調可瘡塗，日二用之。

《聖惠》治小兒頭面身體生瘡，皮膚赤 癢癢。**雄黃散方**

雄黃(三分，細研) 白礬(燒令汁盡) 莽草(各半兩) 井鹽(一分)
上件藥搗，細羅為散，以生油調可瘡塗，日三用之。

《聖惠》治小兒頭面身體生瘡，久不瘥。**胡粉膏方**

胡粉 水銀(與胡粉相和，點少許水，研星盡) 白松脂(各一兩) 豬脂(二兩)
上件藥先將松脂、豬脂入鑊中，煎成膏，以綿濾過，入水銀、胡粉攪令勻，日二塗之瘥。

《聖惠》治小兒頭面身體皆生熱瘡。**黃連散方**

黃連(去鬚) 黃柏(銼) 胡粉 水銀(與胡粉拌和，點水少許，研令星盡。各一兩) 苦參(二兩，銼)
上件藥搗，細羅為散，入水銀、胡粉研勻。如瘡在面上，以面脂和塗之；如在頭及身上，以生油和塗之。

《聖惠》治小兒頭面身體生瘡，久不瘥，宜用洗浴**苦參湯方**

苦參 王不留行(各三兩) 地榆 獨活 艾葉 黃連(去鬚。各半兩) 竹葉(二兩)
上件藥細銼和勻，每用三兩，以水五升，煮取三升，去滓，看冷暖洗浴瘡上。

《聖惠》治小兒頭面身體生瘡出黃膿水。宜用洗浴**黃連湯方**

黃連(去鬚) 甘草(各二兩) 苦參(五兩) 柳枝並葉(一握)
上件藥細銼和勻，每用三兩，以水五升，煮至三升，去滓，看冷熱洗浴即愈。

《聖惠》治小兒頭面身體生瘡黃水出。**黃連散方**

黃連(一兩，去鬚) 胡粉 甘草(銼。各三分)
上件藥搗，細羅為散，以臘月豬脂和如膏，塗於故帛上貼，日二換之。

《聖惠》又方

豆豉(一合，炒令焦) 黃柏(一兩，銼)
上件藥搗，細羅為散，每用先以熱灰汁洗瘡令淨，拭乾敷之。

《聖惠》治小兒頭面身體生瘡。**黑豆散方**

黑豆 大麻仁(各二兩)

上件藥搗，粗羅為散，著竹筒內，橫插熱灰火中，以銅器承受，當有汁出，收之，令汁盡，便塗瘡即愈。

《聖惠》又方

上用膩粉，以蔥汁和塗之。

《聖惠》又方

上以菟絲子二兩，搗令碎，水五升煎取三升，去滓，看冷暖洗。

《聖惠》治小兒頭面身體生瘡赤腫 痛，宜用此洗浴方。

上以地榆八兩細銼，水一斗煮至五升，去滓，適寒溫洗浴瘡，日三上效。

《聖惠》治小兒頭面身體生瘡肉突出方。

上取烏梅肉微炒，搗、羅為末，敷瘡上效。

《嬰孺》治小兒身上惡瘡方。

上以馬骨屑燒灰敷之，若豬脂和敷之。

《嬰孺》治小兒面瘡方。

上用茱萸葉，以東流水煮，浴兒。

《嬰孺》治小兒身面卒生惡瘡方。

上用蜚螻燒灰，豬脂和敷之。

《嬰孺》又方

上以雞子殼燒灰，豬脂和敷之。

《嬰孺》又方

上以蘇枋末研勻敷之，燥則豬脂和塗之。

《嬰孺》又方

上取筍汁洗。

《嬰孺》治小兒身頭悉生瘡方。

上以地榆白皮炒燥為末，酒調塗，綿覆瘡上，蟲出愈。

《嬰孺》治小兒胃氣不調，面目身體發瘡，大便難。**乳胃丸方**

大黃(十分) 細辛(一分) 皂角(炙) 桂心 濃朴(炙) 秦椒 杏仁(去皮) 黃芩 葶藶(炒。各二分) 當歸(三分)

上為末，蜜丸小豆大，飲下二丸，不知加之。

《嬰孺》治小兒逆嘔胃痺，胸脅下滿，不思食，面目身體有瘡，大便難。**大黃乳胃丸方**

大黃(十分) 細辛(六分) 蜀椒 皂角(炙) 乾薑 濃朴(炙) 桂心 秦椒 吳茱萸 杏仁(去皮炒, 別研入。各二分)

上為末, 蜜丸小豆大, 先食飲下三丸, 不知加之。

《嬰孺》治少小胃氣不和, 身體面目生瘡。調氣丸方

枳實(炙) 大黃 黃連 木蘭皮(各五分)

上為末, 蜜丸小豆大, 三歲兒飲下三丸, 量大小加之。

《惠眼觀証》三白散 治頭面生瘡方。

南粉 滑石 白藥子(等分)

上為末, 用生油調塗之。

《劉氏家傳》小兒面瘡方。

上取羊脛骨髓調膩粉, 塗立效, 屢用極驗。

《劉氏家傳》小兒頭面生瘡方

淡豆豉(一兩, 燒存性, 末之) 膩粉(挑, 二錢)

上先以地灰汁洗瘡, 後用此藥摻。如瘡乾, 卻用生油調, 貼三、五次效。

《莊氏家傳》小兒頭面身上生赤肥瘡, 並或如魚子等, 抓破後清水出方。

上桑白皮燒灰如炭, 灰乾擦之, 自較。

《莊氏家傳》治小兒頭面熱瘡並疥癬方。

黃連 寒水石 定粉(各一兩) 黃柏(二兩)

上四物搗為末, 用生油調塗之。

《吉氏家傳》治五年十年面上瘡方。

豉心 白礬 膩粉(等分)

上件為末, 油調塗瘡。

《吉氏家傳》豆豉散 治小兒頭面生瘡, 肥黃不乾, 瘡膿及別肉赤, 成瘡者方。

豆豉 肥珠(和子。各半兩)

上二味, 瓦上燒存性, 為末, 黃丹一錢, 輕粉半錢研勻, 先用蔥湯洗瘡, 絹帛拭乾, 次生油調敷。

《吉氏家傳》又方

梧桐葉(焙乾為末) 輕粉(少許)

上研勻, 先用蔥湯洗瘡, 拭乾, 生油調敷。

《巢氏病源》小兒風疹癩疹候：小兒因汗解脫衣裳，風入腠理，與血氣相搏，結聚起，相連成癩疹。風氣止在腠理浮淺，其熱微，故不腫不痛，但成癩疹瘙癢耳。

《顛凶經》治孩子胎中受風，長後或滿身生瘡，疥癢如疥癩，或如飢飽癢瘡方。

蔥白 硝 臭黃 硫黃(各等分)

上用油半兩，燒令熱，下少許蠟，先剝蔥白三莖細切，待油熱即潑蔥上，細研，續下硫黃、臭黃、硝，更研之旋塗。

《千金》治小兒風癩癩疹方。

蒴 防風 羊桃 石南 秦椒 升麻 苦參 茵芋 芫花 蒺藜 蛇床子 枳實(炒) 礬石(各一兩)
上十三味 咀，以漿水三斗，煮取一斗，去滓，內礬，令小沸浴之。

《千金》又方

上以牛膝末酒服方寸七，漏瘡多年不瘥，搗末敷之。亦主骨疽、癩疾、瘰癧絕妙。

《千金》澤蘭湯 主丹及癩疹入腹殺人方。

澤蘭 芎 附子(炮，去皮臍) 茵芋 本 莽草 細辛(各十二銖)

上七味 咀，以水三升，煮取一升半，分四服，先服此湯，然後作余治。

《千金》治小兒患癩疹入腹，體腫強而舌乾方。

上以蕪菁子末，酒服方寸七，日三。

《千金》又方

上以車前子作末，粉之良。

《千金》又方

上以蠶沙二升，水二升煮，去滓，洗之良。

《千金》又方

上以鹽湯洗了，以蓼子 敷之。

《千金翼》治小兒癩疹方。

上用巴豆五七枚，去心皮，以水三升，煮取一升，以綿內湯中，拭病上，隨手滅，神良。

《千金翼》治小兒風疹癩疹方。

蒴 防風 羊桃根 石南 茵芋 芫蔚 礬石 蒺藜(各一兩)

上八味切，以酢漿水一斗，煮取五升，去滓，內礬石煎令小沸，溫浴之。(《千金》有秦椒、苦參、蛇床、枳實、升麻為十三味。)

《千金翼》又方

上用吳茱萸一升，以酒五升，煮取一升半，拭上。

《外台》：《廣濟》療小兒壯熱癩疹，已服湯丸不消，宜服竹瀝湯方：

淡竹瀝（一升二合）葛根汁（五合）牛黃（三顆，豆粒大，研）

上三味相和與兒服，一歲至五、六歲一合至三合、五合，再服以意增減之。

《子母秘錄》治小兒風疹不止方。

上以白礬十二分，暖熱酒投化，用馬尾酒塗之。

《子母秘錄》小兒風瘡久不瘥方。

上燒菰蒲節末，以敷上。

《聖惠》治小兒風瘙癢疹。麻黃散方

麻黃（去根節）川升麻 葛根（銼。各一兩）射乾 雞舌香 甘草（炙，銼。各半兩）石膏（三分）

上件藥搗，粗羅為散。每服一錢，以水一小盞煎至五分，去滓放溫。量兒大小分減服之。

《聖惠》治小兒風瘙癢疹，壯熱心躁。犀角散方

犀角（屑）川升麻 麥門冬（去心）白蒺藜（炒去刺）甘草（炙微赤，銼。各三分）

上件藥搗，粗羅為散。每服一錢，以水一小盞煎至五分，去滓放溫，量兒大小分減服之。

《聖惠》治小兒風瘙癢疹。黃耆散方

黃（銼）黃芩（各三分）白蘚皮 甘草（炙微赤，銼。各半兩）防風（去蘆頭）枳殼（麩炒微黃。各一分）

上件藥搗，粗羅為散。每服一錢，以水一小盞煎至五分，去滓放溫，量兒大小分減服之。

《聖惠》治小兒風瘙癢疹，癢痛不止。枳實丸方

枳實（三分，麩炒微黃）甘菊花 防風（去蘆頭）麻黃（去根節）白蒺藜（微炒，去刺）浮萍（乾者。各半兩）蛇床子 天雄（炮裂，去皮臍）漏蘆 白薇（各一分）

上件藥搗，羅為末，煉蜜和丸如綠豆大。每服以溫水下七丸。量兒大小加減服之。

《聖惠》治小兒風瘙癢疹，心膈煩悶。茵芋湯方

茵芋 防風 附子 牡蠣 莽草（各半兩）

上件藥細銼和丸，以水一斗，煮取六升，去滓，看冷暖洗浴，避風。

《聖惠》又方

鹽（二合）黃蘆 蒴（各三兩）柳樹空中屑（二分）

上件藥細銼和勻，每用三兩，以水一斗，煮取五升，去滓，看冷暖洗浴，避風。

《聖惠》治小兒風瘙癢疹，皮膚腫，宜用此方。

石南葉(二兩) 川椒(半兩)

上件藥以水一大盞，煎至五分，去滓，入硝石、白礬末各半兩，攪令勻，以綿浸塗腫處，乾即更塗之。

《聖惠》又方

景天草(三兩) 藍葉(五兩)

上件藥搗，絞取汁塗於腫處，以熱手摩之，日三、兩度用之。

《聖惠》治小兒風瘙癢疹，心中悶亂方。

上以川芒硝二兩，清酒三大盞，煎至二盞放溫，洗兒癢處後，燥復洗之，癢癢乃止，避風。

《聖惠》治小兒風瘙癢疹方。

上以虎脂摩之即愈。《嬰孺》云：無虎脂，虎肉亦佳。

《嬰孺》治小兒諸風及熱氣，渾身癢疹。赤膏子方

白藪(一分) 黃連 芍藥 黃柏(各二分)

上為末，以豬脂和如泥，日三上。若得病三日塗三日，五日塗五日，多亦然。

《嬰孺》治小兒癢疹浴湯方。

莽草 防風 附子 牡蠣(赤，各二兩)

上以水五升，煮三沸，浴兒愈。量兒加水藥。

《嬰孺》治小兒體起風疹及腫。枳實膏方

枳實(四分，炙) 芫蔚子 防己(各五分) 升麻(六分) 竹葉(切，七合) 石膏(二兩，末) 芒硝(十二分)

上以麻油一升四合，煎四五沸，去滓，敷瘡上。

張渙 防風湯方 癢疹、瘡疥皆宜服之。

防風 鼠粘子 荊芥穗 人參(去蘆頭。各一兩) 甘草(炙) 天麻(各半兩)

上件藥搗，羅為細末。每服一錢，水八分一盞，入生薑、薄荷各少許，煎五分，去滓溫服。

張渙 麝香犀角丹方 癢疹不瘥，甚者如癩，服之神驗。

天麻 白附子 白僵蠶(炒) 烏蛇肉(酒浸去皮骨，焙乾。各半兩) 犀角(屑，一兩)

以上搗，羅為細末。次入：朱砂(一兩，細研水飛) 腦麝(各一錢。細研)

上件都拌勻，煉蜜為丸如黍米大，每服十粒，煎金銀、薄荷下。

張渙 二聖散方 治癢疹、肌肉青黑。

胡粉 苦參(各一兩)

每件搗，羅為細末。每服一錢，溫酒調下，兼塗患處。

《嬰童寶鑑》治小兒身上生小瘡癢藥方。

宣連 防己(各一兩) 蕪荑(半兩) 膩粉(一分)

上件研勻，先浴瘡子，拭乾，生油調敷。

《吉氏家傳》風瘡：治小兒身上如麻子，或如豆大，亂生多癢，是風瘡也，宜此方。

烏蛇(去鱗，炙) 黃 麻黃(去節) 防風(以上各一分) 枳殼(一片，炙) 朴硝(三分) 桂心(半分)

上以水五合，煎二合，方下朴硝，一歲兒漸漸與服盡。

長沙醫者王兌千金散 治小兒、大人脾肺風血妄行腠理，發為癩疹，積久不瘥，時發心腹疼痛，渾身頑麻，手足拘攣，或心膈癢悶，痰噦嘔逆，吃食減少，頭疼目暈，一發遍身，搔之隨手癢起，煩躁燥癢，萬治不效者，宜服此方。

成塊赤土(一名羊肝石，取膩者細研如面，其有砂石者不可用。)

上一味，每用冷酒調下一錢，一日三服，無有不瘥，發盛煩躁者，更用後藥塗之。

又敷藥方

護火草(景天是大葉，有人家盆種以慎火) 生薑(和皮不洗泥土)

上等分爛研，量多少旋入鹽，合研和勻塗之。如遍身患，只揀癩疹大處塗之，應手消散，余處自沒，若能遍塗尤妙。

長沙醫者劉之才傳治小兒風癢癩疹。芒硝散方

土朱(二兩) 朴硝(一兩)

上為細末，每服一平錢，用生薄荷細研，次用冷水調，蜜水下，不拘時候。

《千金》灸法：小兒、大人舉體痛癢如蟲齒，癢而搔之，皮便脫落作瘡，灸曲池二穴，隨手壯發即灸之，神良。

疥第七

《巢氏病源》小兒疥候：疥瘡多生手足間，漸染生至於身體，癢有膿汁。按《九蟲論》云：蟻蟲多所變化，亦變作疥。其瘡裡有細蟲，甚難見。小兒多因乳養之人病疥而染著小兒也。

《本草》傳一切瘡疥癬、殺一切蟲方。

油(一合) 雞子 芒硝(一兩)

上攪服之，少時即瀉，治熱毒甚良。

《千金》治小兒頭面瘡疥方。

上以麻子五升末之，以水和，絞取汁，與蜜和敷之，若有白犬膽敷之大佳。

《千金》治小兒疥方。

上燒竹葉為灰，雞子白和敷之，日三。亦治瘡 KT 。

《千金》又方

上燒亂髮灰，和臘月豬脂敷之。

《千金》又方

上以臭酥和胡粉敷之。

《外台》：《救急》療疥瘡及小兒身上熱瘡並主之方。

黃連 黃柏 赤小豆 臭黃(各一兩) 水銀(半兩，研相和)

上五味為散，以麻油和，先淨洗瘡，然後塗之，甚佳。

《外台》：《救急》又療小兒瘡疥神驗方。

黃連 糯米粉(各十三分) 水銀(用八分，研) 胡粉(六分) 吳茱萸 赤小豆(各一兩)

上六味搗散，水銀手中和唾，研如泥，以豬脂並水銀成膏。先洗瘡乾拭令淨，以藥塗三兩度瘡。忌豬、雞、魚肉。

《聖惠》治小兒疥，瘙癢不止。**蛇床子散方**

蛇床子 吳茱萸 硫黃(細研) 蕪荑(以上各一分) 膩粉(一錢)

上件藥搗，細羅為散，入硫黃研勻，用油一合，蔥一莖切，入油內，煎蔥黃黑色，去蔥，候油冷，調散塗之。

《聖惠》治小兒疥，遍身皆有痛癢不止。**黃連散方**

黃連(去鬚) 胡粉 水銀(與胡粉點少水同研星盡。各二兩) 吳茱萸(一兩) 赤小豆(一百粒)

上件藥，除胡粉、水銀外，搗、羅為末，入胡粉、水銀同研令勻，以臘月豬脂和塗之。亦治瘡。

《聖惠》治小兒疥及身上熱瘡並治之。**黃柏散方**

黃柏(銼) 黃連(去鬚) 赤小豆 臭黃(各一兩) 水銀(半兩) 硫黃(一分，與水銀結作砂子)

上件藥搗，羅為末，與臭黃、水銀砂子同研令細，用生油調，日三塗之。

《聖惠》治小兒胎中受風，長後或身體生疥，瘙癢不止。**臭黃膏方**

臭黃 硫黃(各一分) 蔥白(一莖，細切)

上件藥研令細，用清油一兩入銚子內，熬令熟，下少許蠟及蔥白，次下硫黃、臭黃攪令勻。膏成以瓷盒中盛，旋旋塗之。

《聖惠》治小兒疥及諸般瘡，洗浴**苦參湯方**

苦參 丹參 苦楝根 防風(去蘆頭，各半兩) 蒴 根(三兩)

上件藥細銼和勻，以水一斗，煎至五升，濾去滓，於密室中洗浴兒，以故帛拭乾，即塗前膏。

《聖惠》治小兒疥，癢不止方。

硫黃(二兩) 白礬灰(四兩)

上件藥細研為散，以烏麻油調如稀麵糊，灸疥令熱，薄塗摩之。

《聖惠》治小兒疥，癢痛不可忍方。

上用硝石一兩細研，以生油調如膏。每用時，先以泔清洗之，拭乾塗之。

《聖惠》又方

上取羊蹄草根搗末，以豬脂和塗之。

《聖惠》又方

上用硫黃細研，以醋調塗之。

《聖惠》又方

上搗蛇床子末，以豬脂和塗之。

《博濟方》治小兒瘡疥及三十六種風疾，服之必愈。**靈寶丸**

天麻(鄆州者，洗) 天南星 白附子(新羅者) 獨活 白僵蠶 川烏頭(炮) 羌活(洗) 乾蠍(全者。各一兩) 牛黃 龍腦(各一分，細研旋入) 麝香(半兩，細研旋入)

上件十一味，各要上好藥淨洗，日內曬乾，不用近火，杵為細末，煉蜜為丸如豌豆大。諸色風疾，薄荷溫酒下五丸。女人血風，更入少當歸末，溫酒下。如癱瘓風下床不得，先用白礬半兩為末，蔥十莖，煎湯溫浴，後用薄荷汁溫酒下三十丸，衣被蓋出汗，別服補藥。如是男子、婦人疥癬瘰癧，並須依前法澡浴，服三十丸，出汗，當日必瘥。小兒瘡疥，亦須如常浴，每一歲一丸，並須出汗，永瘥。忌熱面、豬肉、魚、毒物等。

《養生必用》治疥不以久新方。

白蕪荑(一兩) 檳榔 吳茱萸(各半兩) 硫黃(二錢，別研)

上為末，油調抓破擦。

張渙治小兒疥癬遍身，或頭面生瘡如粟大，浸淫癢痛，搔之膿汁出。**雄黃膏方**

雄黃 雌黃(並細研。各一兩) 川烏頭(一枚，去皮臍，為末) 松脂 亂髮(燒灰。各一分)

上件除雄黃、雌黃外，以豬脂六兩於鑊中煎煉成油，下烏頭、松脂、亂髮等。烏頭色黑，亂髮消盡，膏成。綿濾去滓，入雄黃、雌黃，攪令勻，盛於瓷器中候冷，每用少許塗瘡上，日三兩次用。

《惠眼觀証》**烏粉散** 治頭上疥瘡方。

漆●(二片) 赤豆(一小勺)

上將豆卷在●內，火過，取為末，入輕粉少許，以生薑汁調塗之。

《惠眼觀証》如聖散 治疥癬，他藥治之無驗者用此藥，如聖立效方。

細辛 蕪黃(魚鹽者) 剪刀草 藜蘆 白礬(研，旋入) 硫黃(研、旋入)

上六味各等分為末，用面油調勻，更入豬筒骨髓一條，再研勻和，揩擦瘡上，甚妙。

《惠眼觀証》乳香膏 治小兒疥癬並小兒頭瘡等亦治痲子方。

雄黃(一錢) 乳香 膩粉(各半錢，研細)

上用巴豆二十粒，清麻油四兩，慢火渌令焦黃，不用巴豆，入前三味再煎數沸，以黃蠟半兩，候融化入淨器內。每用先以溫水洗瘡拭乾，用藥塗之甚驗。

《劉氏家傳》小兒身癢欲生瘡方。

何首烏 艾

上件等分，煮水與浴，永不生瘡。

長沙醫者鄭愈傳治臟腑熱，毒壅熱滯、瘡疥等。人參飲子方

人參 大黃 荊芥 天竺黃 甘草(炙。各二錢) 白芷 燈心(各一錢) 鉤藤鉤子(二七個) 梔子仁(五個)

上粗杵為末，以水一碗，煎至半碗，去滓時時服。

長沙醫者丁時發傳治大人、小兒諸般熱毒瓦斯瘡，疥癩瘡方。

海螵蛸 硫黃 青礬(各一錢) 蛇床 黃連(各半錢)

上同為細末，油調塗瘡上或乾用得亦，此藥太妙。

癬第八

(奶癬附)

《巢氏病源》小兒癬候：癬病由風邪與血氣相搏於皮膚之間，不散變生癩疹，疹上如粟粒大，作形郭或邪或丸，浸淫長大，癢痛，搔之有汁，名之為癬。小兒面上癬，皮如甲錯，起乾燥，謂之乳癬。言兒乳飲，乳汁漬汚兒面變生之，仍以乳汁洗之便瘥也。

《嬰童寶鑑》：小兒癬是母於風中浴後，拭之未乾，和水飲乳及夏月汗出而不粉，其瘡細星星者是也。

《千金》治小兒濕癬方。

上以枸杞根搗作末，和臘月豬膏敷之。

《千金》又方

上以桃青皮搗末，和醋敷之，日二。

《千金》又方

上揩破，以牛鼻上津敷之。

《千金》又方

上煎馬尿洗之。

《千金》又方

上燒狗屎灰，和豬脂塗之。

《千金》治小兒癬方。

上以蛇床實搗末，和豬脂以敷之。

《千金翼》治濕癬方。

上取東壁土，摩乾濕癬極有效。

《聖惠》治小兒癬，癢痛不止。**白礬膏方**

白礬灰 硫黃 膩粉(各一錢) 綠礬(半錢) 川大黃(一分，末)

上件藥同研為末，以米醋一升，熬如黑錫，收於瓷器中，旋取塗之。

《聖惠》治小兒濕癬。**附子散方**

附子(半兩，去皮) 雄黃(細研) 白礬(各一分) 吳茱萸(半分) 米粉(半分)

上件藥搗細為散，每日三度，以綿撲。

《聖惠》治小兒癬久不瘥。**雄黃膏方**

雄黃(細研) 多年薤根 白礬 藜蘆(去蘆頭) 瓜蒂 胡粉(各一分) 水銀(三分，與胡粉點少水同研，令星子盡)

上件藥搗羅為末，入胡粉、水銀同研令勻，用豬脂調為膏。輕拭塗之。

《聖惠》治小兒癬不計乾濕，瘙癢不絕。**雌黃膏方**

雌黃(研) 黃連(去鬚) 蛇床子 黃柏(銼) 硝石 蕪荑 莽草 藜蘆(去蘆頭) 苦參(銼，各半兩) 松脂(三兩) 杏仁(一兩，湯浸去皮，別研如膏)

上件藥搗，細羅為散，以臘月豬脂半斤和松脂煎令熔。先下杏仁，次下諸藥，攪令勻，煎成膏。收於不津器中，用時先以泔清淨洗瘡，拭乾，塗於故帛上貼，日二換之。

《聖惠》又方

羊蹄根 乾筍(燒灰，各一兩)

上件藥搗，羅為末，以麻油調塗之。

《聖惠》治小兒久癬方。

獨蓄根(去土，一把) 附子(二枚，去皮臍，生用)

上件藥搗令爛，以好酒和塗之。每塗藥時先以皂角湯淨洗，拭乾後用藥，日二塗之。

《聖惠》治小兒乾癬方。

水銀 胡粉(各兩)

上件藥點少水同研，令星盡，以雞冠血和塗之。

《聖惠》治小兒乾濕癬方。

雄黃(一分) 麝香(一錢)

上件藥細研，用甲煎油調塗之。

《聖惠》又方

上取乾蟾燒灰細研，以豬脂和塗之。

《聖惠》治小兒癬久不瘥方。

上用黃礬一兩，燒灰細研，每用先以水淨洗，拭乾塗之。

《聖惠》又方

上以薤根搗，醋和塗之。

《聖惠》又方

上以醬瓣、雀糞相和研塗之。

《聖惠》又方

上取羊蹄草根爛搗，以蜜和，絞取汁，先揩破塗之。

《聖惠》又方

上以楮株白汁塗之。

《聖惠》又方

上取亂髮燒灰細研，以豬脂和塗之。

《譚氏殊聖》方：小兒乳癬遍身形，眼睫連眉退不生。此是母名傷五泄，發兒損體病還成。野油花共天麻杵，赤箭除風四體輕。天竺烏犀懸劍子，蟾雄龍腦最多靈。

赤芝飲子

野油花(名油覆花) 天麻苗(亦名天箭苗) 防風(等分)

上為末，洗癬了，次以油調塗之，後服烏犀丸。

《譚氏殊聖》烏犀丸方

犀(末, 一錢) 黑豆(二錢) 乾蟾(末, 三錢) 龍腦(少許)
上為末, 以熊膽汁為丸如綠豆大, 溫水化一丸。

《養生必用》治小兒、大人濕癬方。

甘草(二分) 蘆薈(四分, 別研)
上為末, 溫漿水先洗瘡, 後貼藥。

茅先生小兒周歲以上兒生細沙丹, 謂之奶癬方。

地龍(去土, 炒黑為末) 黃連(末) 豆豉
上三味等分為末, 入輕粉, 油調塗。

《嬰孺》治小兒頭面瘡癬方。
上用大麻子五升為末, 以水和絞汁, 和蜜塗之。白狗膽汁塗之亦效。

張銳《雞峰方》治乾濕癬久不瘥者。
上以新楮葉將有芒刺處於瘡上貼, 以手拍之, 候黃水出盡, 乾即瘥。

《惠眼觀証》防風飲子 治風虛瘡癬方。

防風 甘草(炙) 連翹(各一兩) 山梔子(半兩)
上為末, 每服二錢, 水五分煎三、五沸, 去滓服。

《張氏家傳》治小兒頭面生煉銀瘡癬方。

黃連(末) 黃柏(濃者, 取各一錢) 輕粉(二錢七) 乳香(少許, 杵細) 白膠香(為細末) 白礬(如癢生使, 不癢過。各半錢)
上為細末, 先將熔下白膠香, 次下黃連、黃柏, 令溫下粉、乳, 已卻成塊, 再研令極細, 敷瘡上。

《張氏家傳》治大人、小兒濕癬藥方。

桔梗 灶底黃土 豆豉(各半兩) 麝香 膩粉(各少許)
上件三味為末, 後入麝香、膩粉, 用暗芝麻油調塗, 先用溫水洗過, 後用藥塗之, 一上一洗。

《莊氏家傳》治小兒癬及大人惡瘡方。

鍛石 黃丹
上二味等分, 同炒紫色為末, 乾敷妙。

《王氏手集》治小兒奶癬方。
上以苦楝子不計多少, 燒灰存性, 研細入膩粉, 生油調搽極妙。

《吉氏家傳》乾癬方。

巴豆 斑蝥(各一枚)

上件研為極細末，使不見星，取臘燕脂調塗之，日三上。

瘡第九

《巢氏病源》小兒瘡候：者，風濕搏於血氣所成，多著手足節腕間匝匝然，搔之癢痛，浸淫生長，呼為之，以其瘡有細蟲如蟲故也。

《聖惠》治小兒瘡及濕癬。蛇床子散方

蛇床子 附子 雄黃(細研) 吳茱萸 白礬 苦參(各一分)

上件藥搗，細羅為散，敷瘡上，日三服之。

《聖惠》治小兒瘡癢痛螺殼散方

螺殼(一兩，爛者) 亂髮(燒灰) 龍膽(末) 胡粉(各半兩)

上件藥細研為散，以油腳調塗之。

《聖惠》治小兒瘡及疥癬、惡瘡。水銀膏方

水銀 白礬 蛇床子 黃連(去鬚。各一兩)

上件藥除水銀外，搗、羅為末，以臘月豬脂七兩入水銀和研，以不見水銀星膏成，敷瘡神效。

《聖惠》治小兒濕瘡方。

上以胡燕窠一枚，取大寬抱子處，余處不用，搗，細羅為散，每使時先以水煎甘草，入鹽少許作湯，溫溫淨洗瘡，拭乾以散敷之，三兩上便瘥。若患惡刺，以醋和，用帛裹之，日二易當愈。

《聖惠》治小兒瘡及疥癬方。

上用苦參三兩搗，羅為末，以蜜和塗之。

《聖惠》治小兒乾、濕、疥癬方。

上取棟根皮、蔥白搗如膏，以豬脂和塗。

《聖惠》治小兒久瘡及疥瘡內黃水汁出方。

上取羊蹄草根爛搗，以白蜜相和，絞取汁塗之。

《聖惠》治小兒瘡方。

上取桃葉爛搗，以醋和敷之。

《莊氏家傳》大人小兒尾閭骨生瘡，癢不可忍者。

豬欄門泥(但是豬擦臀處泥土取用，或門上木削皮燒灰) 麝香(少許)

上為末，濕則乾貼，乾則油塗。

瘡第十

《巢氏病源》小兒瘡候：小兒為風熱毒瓦斯所傷，客於皮膚，主生漿，而潰成瘡，名為瘡也。

《葛氏肘後》治大人、小兒卒得瘡，一名爛瘡，初起作漿方。
上燒牛屎末，以粉和敷之。姚氏同。

《葛氏肘後》又方
上熬秫米令黃黑，然後搗以敷之。

《葛氏肘後》又方
上末黃連和粉塗之。

《葛氏肘後》又方
上燒鐵令赤，二七度注水中，浴兒，日二、三度。

《葛氏肘後》徐王神效方 兒三歲初患頭上起漿如釘蓋，一、二日面及胸背皆生，仍成瘡。

水銀 朱砂 胡粉 硫黃(各半兩)
上為末，豬膏和塗。禁見狗並青衣小兒、婦女。先濃煮桑汁以洗之，帛子拭淨敷膏，日三夜再，每一洗一易膏。

《千金》治小兒瘡初起漿似火瘡，名曰瘡，亦名爛瘡方。
上以桃仁熟搗，以面脂和敷之。亦治遍身赤腫起。

《千金》又方
上以馬骨燒灰敷之。

《外台》：《備急》療小兒三歲患頭上起漿，如釘蓋，一二日及胸背皆生，仍成瘡方。

水銀 朱砂(各半兩，碎研相得) 石硫黃(一兩，研) 臘月豬脂(和研如膏)
上四味煮桑葉湯洗以敷之。勿令豬、犬、婦人、小兒等見之無效。

《聖惠》治小兒瘡。梔子膏方

梔子仁 川升麻 犀角屑 黃芩(各半兩) 蛇銜(三分) 藍葉 生地黃 川大黃(各一兩)
上件藥細銼，以豬脂一斤同於鍋內，以微火煎令藥色變，濾去滓，以瓷盒盛，候冷塗之。

《聖惠》又方

水銀 松脂 土蜂房 黃柏 川大黃(生用，各一兩) 膩粉(一分，與水銀於手掌上，以拌研如泥)
上件藥搗，羅為末，以煉成豬脂一斤與藥末同入鑊內，慢火熬令稀稠得所，將水銀、膩粉入膏中，攪令勻，膏成以瓷盒盛，候冷塗之，不過三五上瘡。

《聖惠》治小兒卒得瘡赤爛方。
上取牛糞燒灰，細研敷瘡上，日三用之。

《嬰孺》治小兒 毒瘡。梔子膏方

梔子 蛇銜草 藍青(各五分) 犀角屑(三分) 升麻 黃芩(各四分) 生地黄(八分)
上以豬脂切一升三合，煎藥三上三下，去滓敷瘡。

張渙 生地黄膏方 治 漿瘡，毒瓦斯發於遍體者。

生地黄 川升麻 藍葉 梔子仁 川大黃(以上各一兩)
上件藥細銼，以豬脂八兩同於鍋內，以慢火煎令藥色變，濾去滓，以瓷盒盛，候冷，每用少許塗患處。

張渙 朱砂膏方 治 漿起如釘蓋，才發遍體生瘡。

朱砂 胡粉 水銀(各半兩)
上件藥點少水都研，令水銀星盡，以臘月豬脂四兩入銚子內，慢火上融化，攪成膏，以瓷盒盛候冷，每用少許塗患處。

尿灰瘡第十一

《子母秘錄》治小兒尿灰瘡方。
上末伏龍肝和雞子白塗之。

《子母秘錄》又方
上以黑豆皮熟嚼敷之。

酢瘡第十二

陳藏器治小兒酢瘡方。
上以產死婦人塚上草取之，勿回顧，作浴湯洗之，不過三度佳。

陳藏器又方
上以仙人草煮湯浴，亦搗敷之。酢瘡頭小大硬，小者，此瘡或有不因藥而自瘥者。當丹毒入腹必危，可預飲冷藥以防之。兼用此草洗瘡，亦明目，去膚翳，汁滴目中。生階庭間，高二、三寸，葉細有雁齒，似離隔草，北地不生也。

魚臍瘡第十三

《聖惠》：夫小兒魚臍瘡者，此瘡頭黑，深破之黃水出，四畔浮漿起，狹長如魚臍，故謂之魚臍瘡也。

《聖惠》治小兒魚臍瘡方。

蛇蛻皮(一兩，炙微黃) 雞子(一枚，打破取清)
上件藥以水一大盞煎蛇皮至五分，去滓入雞子清，攪令勻，更煎三兩沸，放溫，量兒大小分減服之。

《聖惠》又方

芫花根(二兩, 細銼) 豬牙皂角(五挺) 黑豆(三合) 白礬(三兩, 燒令汁盡, 細研)

上件藥用醋七升, 先浸芫花根及皂角、黑豆三日於釜中, 以文火煎至二升。去滓後卻於別鑊中煎至一升, 入白礬灰, 攪令勻, 膏成以瓷盒盛, 攤於故帛上貼。

《聖惠》又方

上臘月豬脂並髓, 以雞子清調令勻塗。

《聖惠》又方

上以寒食乾餈燒灰, 細研敷之。

《聖惠》又方

上以白蒿莖搗, 絞取汁, 先以針刺瘡上及四畔, 滴汁於瘡中即瘥。

《聖惠》又方

上當瘡上切大蒜片子貼定, 以艾灸二七壯, 逐壯換蒜, 灸畢, 研豆豉濃罨, 定效。

張渙 雞清散方 治身體生瘡出黃水, 四畔 漿起, 狹長似魚臍

上以蛇蛻皮一兩, 燒灰細研, 每用少許, 雞子清調塗瘡上。

王灼瘡第十四

《巢氏病源》小兒王灼惡瘡候：腑臟有熱, 熱熏皮膚, 外為濕氣所乘, 則變生瘡。其熱偏盛者, 其瘡發勢亦盛, 初生如麻子, 須與王大, 汁流潰爛, 如湯火所灼, 故名王灼瘡, 亦名王爛瘡, 又語訛為黃爛瘡。

《本草》治小兒黃爛瘡方。

上以羅勒根燒灰, 敷之佳。

《藥性論》主小兒急黃爛瘡方。

上取赤小豆汁, 冷洗之, 不過三度瘥, 能令人美食。

《千金》治小兒黃爛瘡方。四交道中土、灶下土

上二味各等分, 末之以敷瘡, 亦治夜啼。

《千金》又方

上燒艾灰敷之。《聖惠》方, 瘡乾即用生油調艾灰塗。

《千金》又方

上燒牛屎敷之, 亦滅癩。

《聖惠》治小兒王爛瘡一身盡有如麻子, 有膿汁, 乍痛乍癢, 或時壯熱。赤芍藥散方

赤芍藥 甘草 白藪(各三分) 黃芩 黃連(去鬚) 黃柏(炙, 各半兩)

上件藥搗, 細羅為散, 以蜜水調塗之, 日三、四上瘥。

《聖惠》治小兒王爛瘡及惡瘡。秫米散方

秫米 竹篾(等分)

上件藥燒灰，細研為散，以田中禾下水調塗之，立效。

《聖惠》治小兒王爛瘡初患，一日內色變，二日 漿出，或四畔時赤、漸長。若 漿匝身，即不可療。其狀如湯火燒，宜速用黃連散方

黃連(末) 胡粉(各一兩)

上件藥細研令勻，以生油調塗之。

《聖惠》治小兒王爛瘡初起， 漿似火燒瘡，宜用此方。

上用桃仁，湯浸去皮，搗令爛，以面脂和塗之。

《聖惠》又方

上以吳茱萸，酒煎汁塗之。

《聖惠》又方

上以赤地利搗末，用酥和塗之。(出華山，春夏生，苗作蔓繞草大，上莖赤，葉青似蕎麥葉，七月開白花，亦如蕎麥，根如菝，亦如山蕎麥。《本草》云：所在山谷有之。)

《嬰孺》治小兒王灼惡瘡，一身如麻豆者，戴膿汁，乍痛乍熱乍癢方。

甘草 芍藥 白蘂 黃芩(各三分) 黃連 黃柏(各四分)

上為末，蜜和塗之，日再。亦可作湯洗之良。乃《聖惠》治王爛瘡藥，但《聖惠》以甘草、芍藥、白蘂各三分，以黃芩、黃柏、黃連各半兩。

《嬰孺》治小兒王灼瘡方。

上燒古屋柱作炭，杵末敷之。

火灼瘡第十五

《千金》治小兒火灼瘡，一身盡有如麻豆，或有膿汁，乍痛乍癢方。

甘草(炙) 芍藥 白蘂 黃芩 黃連 黃柏 苦參(各半兩)

上七味末之，以蜜和敷之，日二夜一。亦可作湯洗之。《千金翼》除苦參，只六味，余皆同。

《千金翼》治小兒火瘡方。

上熟煮大豆濃汁溫浴之，亦令無癢。

《千金翼》又方

上以蜜塗之，日十遍。

《兵部手集》小兒火灼瘡，一名 漿瘡，一名火爛瘡。
上用酒煎茱萸，拭上。

黃肥瘡第十六

《巢氏病源》小兒口下黃肥瘡候：小兒有涎唾多者，其汁流溢浸漬於頤，生瘡黃汁出，浸淫肥爛。挾熱者，瘡汁則多也。

《千金》治小兒口下黃肥瘡方。
上取 羊鬚燒作灰，和臘月豬脂敷之，角亦可用。

《千金》治口下肥瘡方。
上熬灶上飯令焦，末敷之。

浸淫瘡第十七

《巢氏病源》小兒浸淫瘡候：小兒五臟有熱，熏發皮膚，外為風濕所折，濕熱相搏，身體發瘡，初出甚小，後有膿汁，浸淫漸大，故謂之浸淫瘡也。

《千金》治小兒浸淫瘡方。

灶中黃土 髮灰
上二味各等分末之，以豬脂和敷之。

《外台》：《備急》療小兒浸淫瘡方。
上燒艾作灰敷之。《千金》同。

《外台》：《備急》又方
上以牛屎燒作灰敷之。《千金》同。

《簡要濟眾》治小兒浸淫瘡，疼痛不可忍，發寒熱方。

上刺薊末，新水調敷瘡上，乾即易之。

《聖惠》治小兒浸淫瘡，漸展不止方。

鯽魚（一枚，長三寸者） 豆豉（一盒）
上件藥搗如膏塗之。亦療馬鞍瘡。若或先起四肢，漸向頭面者，難治也。

《聖惠》又方
上以雞冠血塗之。

《聖惠》又方
上煎鯽魚膏塗之。

《聖惠》又方

上以生鯽魚薄切大片，和鹽貼之。

《嬰孺》治浸淫瘡方。

上取胡燕窠燒灰，水和敷之。

張渙 苦瓠散方 治身體風濕發瘡，膿汁浸淫漸大。

乾苦瓠（一兩） 蛇蛻皮（燒灰） 露蜂房（炙。各半兩） 梁上塵（半合）

上件藥搗，羅為細末，每用半錢，以生油調塗瘡上。